

## TITINE

(A l' après dës “*Trifouyaedjes dèl morâlê*” do Dîvin Mârkeu d' Sâde)

(3)

- On va don fé come çoula, a continuwé Madame do Bouchnisse, vos n' avoz k'a dimèrer vèci èt bèn chûre tot mès consêy èt m' choûter come i faut. I vos va falu vos ployî à mès idêyes èt mès pratikes, ièsse todi bèn richurêye, ni nén m' minti, wêtî auzès caurs, awè dèl djintiyèsse, dèl douceû po totès vos camaraudes èt ni nén riwêtî à z-é fé acrwêre aus omes. Si dji seû continne di vos, didci sakants anêyes, dji m'va vos mète dins ène tchambe à vos tote seûle, avou ène drèsse, on pwate-mantias èt min.me ène mèskène. Avou cki vos aroz polu aprinde, vos aroz auji po ki l' rèsse vos tchèye. Fyoz-m' vîre vosse baluchon... Îe ! vs' avoz la ène miète di liards. Dji m' va lès mète à place por vos... vèci vos n'enn' avoz nén dandjî...

L' sièrmon fini, Yèyète a stî prezintêye aus otès “bauchèles” dèl maujhone èt on lî a dné on lét dins ène dës tchambes di pa-dzo l' twèt. Li lèdmwin ont l' aprustéve po s'n' intrêye dins s' novia monde èt lî apruster l' mîje à pris l' advraedje di s' pitit uchlèt.

Dins lès cwat mwès k' ont chûvu, l' minme martchandîse a stî rivindeuwe à d' pus d' chîj dozennes di galants ki, à chake còp, s' crwèyîne li tot prumî à fé tchère li clitchète.

A paurti d'là, sès prumîs galons wangnîs, èle a stî riconxheuwe come “fêye” dèl maujhone èt polu prinde ène ètîre paurt à totès lès naujchantès pratikes k'on î poléve mète è n' oûve. L' novèle apurdisse s'a rade rindu conte ki, à piède si n' âme po piède si n' âme, ça lî poléve rapwarter branmint d' pus si èle s' arindjéve autrumint. Pokwè bouter à l' chinne kand èle si poléve s' mète à s'conte ?

I n' lî a nén falu lontimps po tot à fait èmacraler on vî disbautchî ki n' s' atindéve a s' è sièrvu k' one pitite dijinne di munutes. Èle a stî bèn rade mèteuwe dins sès propès meubes èt intèrtineuwe avou lès pus grandès laurdjèsses : dinners dins lès mèyeusès aubèrdjes, spèctakes à l'

Opèra, pormwinrnades à l' vile, domèstikes èt vos nn' aroz. Yèyète s'a insi si bèn fait voye èt admirer pas tos costés èt pas tèrtos, k'i n' lî a nén

falu d' pus kat anêyes po rwiner trwès dës omes lès pus ritches do vichnauve.

Kand èle a vèyu l' Comte di Lorsandje lî toûrner autou, èle a vèyu ki l' momint èstéve vinu di s'sièrvu di tote si syince po s' mète on bon còp à iute di totès lès èburtakes dèl vîye à vnu. L' Comte, avéve dèdja bèn èdaumé l' fortune ki lî vinéve di sès parints mins i vinéve co d' èriter do costé di s' feume, mwate dispû sèt mwès. Maugré ène mwèje gote ki l' fiéve sovint chalter, arivé à l' cinkantine, i comincéve seulmint à s' amuser à s' môde. Yèyète l' a si bèn l' èmantchî di tote li syince di sès mamouîrs èt cobèrolâdjès dins lès linçouîs ki nosse Lorsandje a volu a tote fwace lî stichî l' ania au dwèt.

Adon, avou c' k' èle avéve ritnu di c'k'èle avéve apurdu dins l' timps mon lès Bèguènes, l' novèle Comtèsse a, sins aroke, arivé à bèn tnu s' noûve roye...



\*\*\*\*\*

**On comache todi...**